

四庫全書

集部

欽定四庫全書

午亭文編卷二十九

大學士陳廷敬撰

講筵奏對錄

有序

臣廷敬伏惟

聖主以天縱生知好學不倦

臣

叨侍

講筵多歷年所仰聆

天語闡明經義契往聖之心傳實前王所未有盛德日

新光輝宣著是以措天下於隆平開萬年之景運文謨
武烈史不勝書皇哉唐哉至矣盡矣臣自惟愚陋莫贊
高深每當

玉音下詢獲申奏對因而講義之外薄有敷陳茲謹輯
錄數條仰紀

聖學之崇宏俯志微臣之遭遇名曰講筵奏對錄臣不

任慶幸悚慄之至

戊午九月五日臣廷敬進講啓乃心沃朕心若藥弗

瞑眩一節惟整乃僚一節嗚呼欽予時命一節

上曰朕觀高宗命傅說諄諄以納誨輔德為言可見自古君臣一德一心至誠孚感為上者實心聽納以收明目達聰之益為臣者實心獻替以盡責難陳善之忠然後主德進於光大化理躋於隆平後世君臣之間徒為虛文中鮮實意治不逮古職此故耳廷敬奏言有高宗之為君所以有傅說之為臣

皇上此言誠社稷萬年之大慶也

壬戌某月某日進講晉康侯用錫馬蕃庶晝日三接
奏對言人臣盡忠事主豈得以希榮干寵為心人君
以禮使臣固必有報德酬功之典

日講六二晉如愁如貞吉受茲介福于其王母象曰
受茲介福以中正也奏對言守正不阿君子立身之
大防依違于進小人求容之私計以六二之賢而有
愁如之象蓋賢者事君以得時行道為念非為一己
之榮辱進退而然也故爻曰貞吉象曰中正於此而

察人才之邪正審心術之公私俾為臣有喜起之風而無愁如之意此實治道污隆之所繫也又云受茲介福此蓋論其理耳亦有懷才抱德而沉於下僚亦有才微德薄而竊據高位此理之所不必然而事之所常有者故六二之介福聖人所以深慶之也

日講六五悔亡失得勿恤往吉无不利象曰失得勿恤往有慶也奏對云昔者帝堯之時擊壤之歌曰帝力何有於我哉康衢之謠曰不識不知順帝之則而

孟子論王道亦曰民日遷善而不知為之者此見帝
王天覆地載之量無一毫計功謀利之私六五失得
勿恤深合此意所以吉无不利往而有慶也

五月初九日講初九明夷于飛垂其翼君子于行三
日不食有攸往主人有言象曰君子于行義不食也
奏對言傳曰枉己者未有能正人者也古之人所以
嚴於去就之義者非愛其身正愛其道耳故士君子
必有難進易退之節而後有匡王定國之勲此明夷

之君子所以守不食之義也又奏對言薛方王莽時人莽以安車迎方方謝曰堯舜在上下有巢由今明主方隆唐虞之德小臣欲守巢由之節莽悅其言遂不强致故曰薛方保身而自全揚雄為莽大夫莽惡劉棻等符命之說置於法棻嘗從揚雄學作奇字治獄使者欲收雄時按書天祿閣恐不免乃從閣上自投下故曰揚雄投閣而不免也士君子觀薛方揚雄之事可以得處明夷之道矣

初十日講六四入于左腹獲明夷之心于出門庭象
曰入于左腹獲心意也奏對言此一爻商之微子當
之其在書曰吾家耄遜于荒又曰王子弗出我乃顛
隲其後微子抱祭器歸周以存商祀正得此爻之意
十一日講箕子之明夷利貞象曰箕子之貞明不可
息也奏對言殷有三仁微子之去利而不貞比于貞
而不利惟箕子之所為利也貞也故象傳曰箕子以
之爻辭曰箕子之明夷所以表忠良之隱原臣子之

心而聖人繫易之旨深矣

十七日講象曰風自火出家人君子以言有物而行有恒奏對言帝王以天下為家一言之微有前後左右之竊聽一行之細為子孫臣庶之隱憂是以聖帝明王必慎乎此

十八日講家人嗃嗃悔厲吉婦子嘻嘻終吝象曰家人嗃嗃未失也婦子嘻嘻失家節也奏對言齊家治世莫善於禮禮本天下之至嚴用之各得其分則至

和故齊家者與其過於和寧過於嚴與其過於嚴寧
準於禮準乎禮則無過嚴之失而有至和之美矣

二十二日講睽小事吉奏對言睽之時可小事而不
可大事矣至於世道休明之日人心聯合之時正當
大有為之際必有紀綱宏遠之規模為社稷靈長之
大計慮萬年毋狃於旦夕成大事毋見於小利此又
憂盛危明防於未睽之道也

二十四日講九二遇主于卷无咎象曰遇主于卷未

失道也奏對言人臣當進以禮退以義平居有難進
易退之節則臨事有尊主庇民之功蓋士人一身之
進退為禮義廉耻之所關即為世道人心之所繫故
必合於道而後可然此在平日以禮義廉耻養之然
後人以禮義廉耻自處格人心而正風俗此尤為要
務也

二十六日講六三見輿曳其牛掣其人天且劓无初
有終象曰見輿曳位不當也无初有終遇剛也奏對

言无初有終聖人亦論其理當如此蓋論其理邪固不能勝正而歷觀古來邪正之際正實往往不能勝邪惟

聖人在上能使君子道長小人道消斯可以決其理之不爽耳

二十八日講睽孤見豕負塗載鬼一車先張之弧後說之弧匪寇婚媾往遇雨則吉象曰遇雨之吉羣疑亡也論君臣道合奏對言上有堯舜之君下有皋陶

稷契之臣明良喜起都兪吁咈於一堂之上後世如唐之太宗致治幾於三代之隆亦必魏徵房杜之為其臣故能成貞觀極盛之治此可謂君臣道合一德交孚也

二十九日講蹇利西南不利東北利見大人貞吉奏對言利西南不利東北言濟蹇之道貴得地利也昔漢昭烈有撥亂之志諸葛亮有王佐之才然而困於西蜀一隅者以不得地利也利見大人言濟蹇之道

貴得其人也昔張子房之從漢高馬援之歸光武可謂得其人矣貞吉言濟蹇之道貴得其正也三代以後有濟世安民之功如唐之太宗宋之藝祖亦可謂得貞吉之意者矣

八月十八日講初六无咎象曰剛柔之際義无咎也奏對言此一爻專主臣道言蓋以柔在下則有小心恭順之誠而上應乎剛則有擔當任事之力此皆无咎之道然解卦諸文皆以解小人為義大抵易之一

書扶陽抑陰進君子退小人之意為多不獨解卦諸
爻為然此所以有資於治道也

十九日講田獲三狐得黃夫貞吉象曰九二貞吉得
中道也奏對言解小人所以杜惑上殘民之禍者也
從來上之德意不能下究民之疾苦不能上聞者皆
小人為之壅蔽於其間也故貴解而去之小人之害
有不可勝言者蓋小人未得志之時必工為諂媚之
術既得志之後則肆其險毒之奸是以斷然必解而

去之也

二十三日講君子維有解吉有孚于小人象曰君子有解小人退也

上問君子小人奏對言小人患得患失無所不至其貪位固寵之術有如物之固結而不可解聖人特筆書之曰君子維有解蓋言斷然解去之不使其為國家之患也又講義有郭之所以危句奏對言昔齊桓公至於郭國問郭之父老曰郭何以危父老對曰郭公

善善而惡惡桓公曰善善而惡惡是賢君也郭何以危父老對曰善善而不能用惡惡而不能去郭之所以危也觀於此可不戒與

二十六日講上六公用射隼于高墉之上獲之无不利象曰公用射隼以解悖也奏對言隼以象其凶惡高墉以象其權勢小人而乘權藉勢乃刑法之所必加也故不曰解而直曰射此所以嚴小人之誅也上文在大臣之位大臣以天下為心無一己之私好私

惡然後有天下之公是公非是非明而後國是定國是定而後人心正治道成

九月初七日講象曰山下有澤損君子以懲忿窒欲
奏對言人心本然之善原與太虛同體太虛中無一
物吾心中亦無一物所以聖賢格物之功正以求復
其無物之體故損之又損以至於無乃見此心本然
之善而其所最當損者莫過於忿慾兩端懲之窒之
則凡類於忿欲者可以不勞而克治之矣

十九日講六三三人行則損一人一人行則得其友
象曰一人行三則疑也論朋黨奏對言君子以同道
為朋小人以同利為黨苟不辨其邪正而惟以其同
則指為朋黨不免有黨同伐異之患歐陽修朋黨論
正是此意

二十一日講六五或益之十朋之龜弗克違元吉象
曰六五之吉自上祐也論楚人以二臣之賢珍於白
珩齊王以四子之功美於照乘奏對言昔楚之王孫

圉聘於晉趙簡子問曰楚之白珩猶在乎王孫圉對
曰楚未嘗以此為寶楚之所寶者觀射父能作訓辭
以行事於諸侯又有左史倚相能道訓典以朝夕獻
善敗於寡君此楚不以白珩為寶而以善人為寶也
昔齊威王魏惠王會田於郊惠王以徑寸之珠照車
前後各十二乘者誇於威王威王曰寡人之所以為
寶者與王異吾臣有檀子者使守南城有盼子者使
守高唐有黔夫者使守徐州有種首者使備盜賊此

四臣者將照千里豈特十二乘哉惠王有慙色此齊以四子之功勝於照乘之珠也

二十三日講彖曰損上益下民說无疆自上下其道大光利有攸往中正有慶利涉大川木道乃行奏對言損上益下之主以至誠惻怛之心為愛養斯民之政初不計民之為我用也而當此之時動罔不臧故彖辭曰利有攸往利涉大川彖曰損上益下民說无疆可見損上者正所以益上也有子嘗言百姓足

君孰與不足百姓不足君孰與足大學言與其有聚斂之臣寧有盜臣如裴延齡桑弘羊輩皆以言利固寵一時貽譏後世此又可以為龜鑑也

日講六四中行告公從利用為依遷國象曰告公從以益志也奏對言舉天下之大事在於得天下之民心而所以得民心之道惟在聖君賢臣朝夕講求以實心行實政非一切權宜之計所可幾也如漢文帝之止輦受言唐太宗之虛懷納諫所謂諫行言聽膏

澤下於民正此文之義也

十八日講上九莫益之或擊之立心勿恒凶象曰莫
益之偏辭也或擊之自外來也奏對言聖人最惡言
利之臣至比之為盜臣之不如昔周厲王以榮夷公
為卿士榮夷公言利之臣也芮良夫諫之以為不可
用其後厲王卒用榮夷公為卿士諸侯自是不享則
芮良夫之言驗矣又講大揚于王庭孚號有厲告自
邑不利即戎利有攸往奏對言君子光明磊落即有

過失人所易見小人巧佞回邪患得患失凡所以貪位固寵者無所不至又能形人之短見已之長能使
人主信任而不疑故得專權而肆其惡昔唐德宗謂
李泌曰盧杞清忠彊介人言其奸邪朕初不覺泌對
曰此乃杞之所以為奸邪也使陛下覺之豈有建中
之亂乎泌之所言正有合於知人其難之義

十一月十四日講義曰夬夬也剛決柔也健而說決
而和揚于王庭柔乘五剛也孚號有厲其危乃光也

告自邑不利即戎所尚乃窮也利有攸往剛長乃終也奏對言大抵易言君子小人之際未嘗不委曲詳盡而於君子所以決去小人之道又未嘗不反復丁寧雖以五陽之盛決一陰之微而諄諄告戒如此可見小人之難去而君子往往不能勝之也

十六日講九二惕號莫夜有戎勿恤象曰有戎勿恤得中道也奏對言小人讒害君子不在於大庭廣衆之際而在於燕閒私語之時使人主聽受其言而不

金少曰卷二十九
覺故聖人比之為莫夜之戒惟

聖明之主嚴絕其端則可以無此患矣故曰所言公公
言之所言私王者無私

二十七日講上六无號終有凶象曰无號之凶終不可
長也

上顧廷敬曰君子得志尚能容小人小人得志必不能
容君子對曰誠如

聖言此古今同慨惟

聖明在上有以察之

經筵講章

天叙有典勅我五典五惇哉天秩有禮自我五禮
有庸哉

此臯陶陳安民之謨以告帝舜也謂夫五倫在人自其
經常不易者謂典蓋原於上帝付予之初固天叙之也
然天能叙之不能保其後也所以立之教化勅正我五
典使倫叙益厚者則在人君矣五典在人自其節文不

過者謂禮蓋天理之品節固天秩之也然天能秩之不能保其繼也所以立之制度用我五禮使品秩有常者則在人君矣是典禮出於天而為君道之所係如此臣因是而繹思之盡倫本乎天道要惟惇厚以咸宜制禮順乎人情尤貴庸常而可久是知大典大禮之宗必屬作君作師之任矣仰惟

皇上教先親遜化首溫文藝極陳常立愛立敬以訓世綏猷節性中規中矩以宜民固已覺悟羣倫斟酌百代

矣臣愚更願建中垂裕創制顯庸彝紀懋修益奏協和之化經綸盡善彌勤訪堯之衷斯率土共識尊親而編氓咸知禮讓矣臣愚不勝顙望

克明俊德以親九族九族既睦平章百姓百姓昭明協和萬邦黎民於變時雍

此一節書是史臣紀帝堯放勳之實也謂夫德性之中萬善悉備合天地民物為一體統親疎遐邇於同原德本自大也惟其有物欲之私所以鮮昭融之量而人已

之間多扞格矣惟帝克天理渾然能明其大德存諸心者此德之全體具足見諸身者此德之妙用流行推此德以親九族則倫紀以修恩義以篤九族已親而睦矣推此德以平章百姓則舊染之俗咸與維新畿內之民皆昭然自明其德矣推此德以協和萬邦則萬邦黎民美哉變惡為善已於是而雍和矣是勲放於家國天下者如此臣因是而繹思之執中開危微精一之傳為千古入君之極則明德立修齊治平之準實萬世聖學之

源流故知開天首出之一人必有過化存神之偉烈仰惟

皇上迪哲無逸生知敏求稽古弘經闡傳心之要察倫明物大保治之規固已建巍巍之成功宣亶亶之令聞矣臣愚更願性道彌崇

皇風益暢天行不息時厯於聰明睿知之心日進無疆允懋夫聖神文武之治則丕振光華之盛績而永垂佑啓之鴻圖矣臣愚不勝顙望

丈言曰元者善之長也亨者嘉之會也利者義之
和也貞者事之幹也

此一節書是孔子申言乾德之具於人心也謂夫乾天
道也亦人道也人得天之氣以生渾然與天同體故元
亨利貞四者在天為春夏秋冬造物無心而成化在人
即為仁義禮智懿德不言而同然觀夫元之為仁者慈
祥一念統百行而開先乃衆善之長矣亨之為禮者經
緯萬端合情义而並粹乃嘉美之會矣利之為義者物

得其裁制則分定而情安義之所由以和矣貞之為智
者識進於堅凝則見明而守固事之所依為幹矣天德
之本然具於吾性者如此臣因是而繹思之人生為萬
物之靈固備仁義禮智之全德維皇建庶民之極允兼
聖神文武之宏圖故能體道於當躬自可繼天而作則
仰惟

皇上性裕中和學勤遜敏藝倫攸叙立萬國之儀型精
一常存紹百王之心法固已亶聰明而作又勵夙夜而

觀成矣

臣

愚更願廣運無疆升恒有永允懷而修來日

積懋敬而聖域彌優則道畢協於四氣之和而福長縣

於億年之久矣

臣

愚不勝顙望

君子體仁足以長人嘉會足以合禮利物足以和

義貞固足以幹事

此一節書是言君子兼體四德之全功也文言曰元亨利貞之德在人皆有其同然而盡性合天之功惟君子乃為克備君子與仁合一而存發皆仁故足以大仁民

變物之施而長人矣美其所會而動固不臧故足以協
天秩天叙之常而合禮矣於分之所宜因物而各足之
則安生於分定和生於能均而足以和義矣知正之所
在而固守之則定見不疑定守不撓而足以幹事矣君
子兼體四德之全功如此臣因是而繹思之天命不已
元亨利貞之所以流行也聖功無息仁義禮智之所以
體備也默契天人性道之大本端望乘乾首出之一人
仰惟

皇上法天廣運如日正中式廓鴻圖聲教實朔南之暨
聿新駿命惠懷無遐邇之殊固已履中蹈和揆文奮武
矣臣愚更願大猷允塞至德彌崇清明在躬凜惟幾惟
康之旨夙夜基命厘未安未治之心則天德與王道同
功修已與治人兼至將美化浹於四海而福祚永於兩
儀矣臣愚不勝顙望

帝庸作歌曰勅天之命惟時惟幾乃歌曰股肱喜
哉元首起哉百工熙哉

此言虞帝勉其臣以保治之道也當舜之時天下既已
乂安而舜之心猶恐怠荒易啓用作歌相儆先述其意
曰天命難諶至為可畏欲保治於無窮必操心於不懈
惟一時之暫惟一事之微無弗戒勅庶天命可永保也
乃歌曰為臣者樂於趨事而股肱喜哉則治化振興而
元首起哉庶績修舉而百工熙哉蓋舜以保治之道望
其臣者如此臣因是而繹思之天體雖高而動靜云為
無時非旦明之所寓天道雖遠而典禮命討無事非陟

降之所臨惟主臣交致其憂勤斯化理聿臻於隆洽仰
惟

皇上乾行剛健謙德尊光

睿學精深淵衷於夙夜宸章炳煜昭泰象於星雲固
已紹二帝之心傳鞏萬年之基緒矣

臣愚更願治益求

治安愈圖安日進無疆默契貞恒之運皇建有極宏敷
彝訓之休則府事茂底於修和而功德彌徵於魏煥矣

臣愚不勝顙望

子曰君子矜而不爭羣而不黨

此一章書是以君子立持已處衆之坊也孔子意謂人之品誼貴於嚴毅自持然或過於立異勢必涉於乖戾之為君子則莊以飭躬可謂矜矣而未嘗以氣陵人何爭之有人之度量貴於樂易可親然或一於從俗勢必入於阿比之私君子則和以應世可謂羣矣而未嘗以情徇人何黨之有君子於人已之際各得其宜如此

臣

邪正觀人者即其為同為異可以別人品之偽真允惟明作惇大之朝克有正直和平之化仰惟

皇上思睿作聖體仁長人是訓是行廣敷言於率土惟和惟一開泰運於中天固已立極臣鄰協衷堂陞矣臣

愚更願道隆位育功茂裁成政教遐宣三德之剛柔並又風聲丕樹四方之綱紀常新則至化作人賡雅歌於棧樸羣工亮采接盛際於唐虞矣臣愚不勝顙望

易簡而天下之理得矣天下之理得而成位乎其

中矣

此一節書見聖人體道之極功也孔子繫易傳曰人心與天地本同一原而聖人之極功合乎天地蓋此易知簡能之理天地之所以立心即聖人之所以合撰人能以一心會易簡之原則天下萬殊之理無所不貫洵足以範圍曲成而不遺矣夫法乾之易而天下之險阻皆平法坤之簡而天下之紛紜自靜將見天位乎上地位乎下而人成位乎其中體道之極功寧外易簡以致之

哉臣因是而繹思之帝王本天地之德以居心即協天

地之化以為政天施地生覆載之神功也府修事和裁
成之大用也而惟此易簡之理貫決其間宰之者不勞
斯出之也自裕聖人參贊高深為萬世人道之準端在
此矣仰惟

皇上得一以貞兼三出治主敬存誠而立極明作惇大
以有功固已廣運被於兩間彌綸周於無外矣臣愚更

願升恒不息悠久無疆富有日新備篤實光輝之妙甄

陶鼓舞昭流行化育之機則四時成序於不言萬國同風而遵道矣臣愚不勝顙望

教胄子直而溫寬而栗剛而無虐簡而無傲詩言志歌永言聲依永律和聲八音克諧無相奪倫神人以和

此言舜命夔以豫教之道也虞書紀舜之命夔曰汝以樂教胄子在涵養其德性使直遂者濟以溫厚寬緩者濟以莊栗剛勁者無至刻虐簡略者無至傲慢焉若夫

作樂之道則心發於言而爲詩是詩以言志也有詩則有節奏可歌是歌以永言也有節奏則有高下清濁之聲是聲依永而出也有聲則有十二律以調和之是律以和此聲也由是播之八音皆能諧和不失倫序而薦之郊廟奏之朝廷神人無不和矣蓋舜之命夔者如此臣因是而繹思之善教必先毓德在淑其性而節其情聖學具有全功惟興於詩而成於樂故盛世有廣大清明之象而熙朝多溫文恭敬之風欽惟

皇上精一執中光華復旦止慈止孝聿徵大順之休作
君作師式表元良之範固已道隆創述慶衍靈長矣臣
愚更願德合乾符祥凝泰運升中以迓鳳儀之瑞垂裕
以開燕翼之謀則基緒萬年而本文百世矣臣愚不勝
顯望

致廣大而盡精微極高明而道中庸溫故而知新
敦厚以崇禮

此言君子尊道之極功也言德性本自廣大惟致之以

擴其全量又問學而精察於幾微期至夫窮神達化之
實德性本自高明惟極之以復其本體又問學而體驗
於日用求當乎民彝物則之恒德性之已知者故也溫
之而涵泳於不已又問學以充拓理義俾見其日新焉
德性之已能者厚也敦之而培養於不息又問學以體
尚節文務底於日崇焉蓋君子尊道之功如此臣因是
而繹思之德性即心而具存心乃養性之功問學以知
為端致知實進學之要故雖生知安行之聖猶勤遜志

時敏之修仰惟

皇上健協天行靜符人極道彌綸於六合廣運難名德
宥密於一心精純罔間固已誕登文岸覃被堯光矣

臣

愚更願上理彌隆大猷永秩執契以宰清寧之化垂裳
而著熙皞之風則九服承休而萬年詒燕矣

臣

愚不勝
顙望

孟子曰盡其心者知其性也知其性則知天矣

此發明心性之學見知性之為要也孟子言人之一心

具衆理應萬事有全體大用焉而欲極其本然之量則必由於知性蓋性爲心所具之理人能於吾之心體一無所虧者必其於吾之性分一無所蔽者也顧性蘊於心而原於天在人爲性在天卽爲命非有二也既能知性則性之所從出者亦洞徹無間知天固不待他求矣孟子究言心性之學如此臣因是而繹思之盡心由於知性格物致知誠意正心之功也知性卽以知天居敬窮理盡性至命之事也天德王道豈非一以貫之者哉

仰惟

皇上建極綏猷執中宰化體文武聖神之德勲華上婉
唐虞立天人性命之宗道法同符洙泗固已範圍六合
胞與羣生矣臣愚更願位育茂隆清寧永奠登道岸而
仁風丕應握治原而協氣旁流則百福凝休而萬年垂
裕矣臣愚不勝顙望

天地之道博也厚也高也明也悠也久也

此言天地功用之盛一如至誠之所徵也子思謂夫天

地之道惟其不貳故氣化流行各極其盛自地道言之
既含弘而無外又靜深而無間博也厚也自天道言之
既神功之峻極又光明之下濟高也明也合天地之道
言之既運行而有漸又始終之不渝悠也久也蓋天地
之誠初與至誠無異故天地之徵亦與至誠相符者如
此臣因是而繹思之天道得一以常清地道得一以常
寧極覆載生成之功不外至誠無妄之理聖人參贊化
育於此可見矣仰惟

皇上聰明時憲聖敬日躋惇大明作而早奏昇平久道
化成而猶勤宵旰固已功符首出德合無疆矣臣愚更
願熙皞同風彌綸罔間有生之族涵濡於樂利之天於
萬斯年沐浴乎隆平之化則太和普洽而至治益光矣
臣愚不勝顙望

子曰人能弘道非道弘人

此一章書是孔子勉人以體道之實也孔子謂道之大
原出於天道之實理備於人誠以天命人以性人率性

而為道故能格物致知以立其本明善誠身以復其初
推而極之齊治均平參贊位育以擴其量莫非道也莫
非人之能有以弘之也苟非其人道不虛行道豈能弘
人也哉人之不可以自諉也如此臣因是而繹思之道
在於人治本乎道故有內聖外王之學斯成可久可大
之功仰惟

皇上聰明睿知文武聖神宥密本乎一心執中宰物彌
綸遍於六合廣運成功固已會千古道統之歸立萬世


人倫之則矣臣愚更願鴻猷允塞大化彌彰御邳隆之
圖協淳風於有永撫久安之運綿寶歷於無疆則道法
並治法常昭而

皇極與人極丕著矣臣愚不勝顙望

講筵在日講外每歲春二月秋八月進講先是臣
前後為日講官兼經筵講官者八年及遷職院部
去日講前後為經筵講官又十年自癸未直內閣
仍兼經筵於今又七易年所矣蓋經筵

命講_臣獨為多今存講義數首以識大略雖局促無所發明存之以見

聖主典學之勤如此也康熙己丑十二月_臣廷敬恭跋



午亭文編卷二十九

欽定四庫全書

集部

午亭文編卷三十三

三十三

詳校官庶吉士臣汪彥博

助教臣常循覆勘

總校官庶吉士臣倉聖脉

校對官中書臣牛稔文

謄錄監生臣蔣翰

欽定四庫全書

午亭文編卷三十

大學士陳廷敬撰

奏疏

歲終彙進講義疏

康熙十六年十二月十五日經筵日講官起居注翰林院掌院學士兼禮部侍郎教習庶吉士臣陳廷敬題竊惟積日月而成歲不已維天合經史以為功其勤者聖

蓋典學行政道本相資溫故知新事須交盡我

皇上亶聰亶明之資實由天授好學好問之篤度越前
王出臨正朝則躬理萬幾深居大內則潛心羣典隆寒
盛暑不廢丹鉛綴衣虎賁皆通章句逮於講幄尤切
皇情每當敷奏先從

天語發揮凡有諮詢迴出諸臣意表講畢有再拜之儀特蒙
賜免頻年有便繁之錫更荷重

頒此皆亶古所未聞而今茲所始覩者也臣等叨預

顧問之榮班愧乏涓埃之微助歲華欲滿舊例宜循其
四書講義已於康熙十四年閏五月遵

旨先期彙進今將講過通鑑講義繕寫裝潢題明進呈
伏願

聖心折衷於誦讀之餘發揮於施行之際文武之道備
在一人堯舜之治永傳萬代矣臣等不任諄切之至

進呈刊完日講四書解義疏

康熙十六年十二月十八日經筵日講官起居注翰林

院掌院學士兼禮部侍郎教習庶吉士臣陳廷敬題臣

等於康熙十六年三月十三日恭侍

弘德殿進講蒙

皇上面諭四書已經講完講章應行刊刻臣等叨
塵法從日侍經幃伏覩

皇上聖躬親講典學彌殷

天語下詢訪道愈篤凡在六經諸史靡不極意研精至
於四子之書實備百王之道比年以來次第進講歷寒

暑而罔間積日月以成編固已體驗於

宸衷抑且發揮於政治除按日進覽年終彙呈盡在

御前時屢

睿照廼者思垂永久

親降綸音爰令校刊宣布中外竊惟

皇上聖學崇深真足超軼往古臣等經術淺陋曷克仰
助涓埃顧鄒魯之大義微言炳如星日而師儒之參稽
互訂著在簡編嘗慕宋臣以半部佐君先明敬信節愛

願學朱子以四字入告亦曰誠意正心即致斯世於治平不外明德新民之理而使吾

君為堯舜敢忘責難陳善之思仰惟宵旰之勤勞不輟宮闈之誦讀永光訓示則臣民臣等謬效編摩復加刪潤校鋟成帙裝潢進呈惟我

皇上嘗垂乙夜之觀存諸几席允懷千聖之道如晤羹牆將見文命誕敷而光華普著矣臣謹具題恭進以

聞

歲終講義循例題明兼陳愚悃疏

康熙十七年十二月十七日經筵日講官起居注翰林院掌院學士兼禮部侍郎臣陳廷敬題竊惟體乾德之運行學惟時敏成聖功於歲月理本日新蓋百王之治雖殊道實同於師古而六經之文具在用之足以宜民必積累之崇深乃化裁於久大欽惟

皇上聖自生知才惟天授以虞舜之濬哲有大禹之克勤機務至多聽斷每煩於日是圖書在御講誦常至於

夜分既已循習簡編守二帝三王之大法抑又研精傳
注窮殷盤周誥之全經

帝庸作歌敕命凜惟幾惟康之旨

皇建有極敷言叶無偏無陂之音隻句片詞炳若日星
之訓含毫落紙煥乎雲漢之章宣天地之中和義兼雅
頌躋臣民於文治功並典謨臣等久歷金華又彌寒暑
親承

玉色得侍燕閒曾莫効其微勞實難醕於

恩遇伏查歲終講義例應彙寫進呈但尚書講義現在
發刊而逐日進講已留

御覽曾經請

旨停進謹循舊例題明伏願道協時行化同天運仰於
穆之不已知日進於無疆則綏將純嘏之方來膺保永
圖於孔固矣臣等無任諄切之至

慰問謝恩疏

康熙十七年十二月十三日經筵日講官起居注翰林

院掌院學士兼禮部侍郎臣陳廷敬奏臣草茅豎儒質
愚學陋謬膺重任累厠清班無裨

聖學之高深曷稱

君恩於萬一今臣母張氏不幸奄逝仰蒙

睿念遣使慰問於本月初十日內閣學士臣屯泰翰林
院掌院學士臣喇沙里到臣私寓傳奉

詔旨賜臣茶酒臣自顧何人叨茲曠典呼天搶地誓報

捐糜臣母九原之下均戴感於無盡矣臣謹奉

恩賜茶酒告奠

臣

母席前望

闕叩頭並乞

天使轉奏訖竊念一介之寒微敢勞曲軫况當萬幾之勤瘁猶厘

洪慈

恩重難酬感深莫罄

臣

邁奔子舍徒切望雲之悲回睇

神京彌懷向日之戀

臣

不勝哀感涕零之至謹具本奏謝以

聞



諭祭謝恩疏

康熙十八年七月初一日經筵日講官起居注翰林院
掌院學士兼禮部侍郎臣陳廷敬奏臣以母憂於本年
正月內回籍守制匍匐就道星夜遄奔抵舍以來寢處
苫塊於六月內得閱邸抄禮部一本為恭請優卹事奉
旨陳廷敬侍從勤勞其母准照學士品級賜卹欽此臣
不勝悲慟不勝感激恭設香案望

闕叩頭謝恩訖臣自遭哀疚深荷矜憐辱

天使之光臨沐

恩頒於稠疊

皇慈無盡禮數逾涯復奉

特旨憫

臣

微勞糜骨難疇撫膺知感伏念

臣濫塵史局者

廿載備員經幄者七年文章虛負時名講論略無裨補
時餒尚方之膳兼分內帑之金緣

皇上推至心以待人俾微臣資厚祿以將母未免瞻雲
之望粗紓愛日之勤不意臣命數奇窮致煩

皇上睿懷軫念終天永訣徒遺慟於生前

新命洊加實增光於身後茲逢優異備極哀榮徑從學士之階不拘詹事之考皆故事所未有雖勲舊何以加臣自惟三錫頻仍彌懼班行之忝竊即臣母九原可作應驚品秩之驟遷荷寵如斯未報涓埃於

盛世捐軀何日敢懷疾痛之餘生仰惟

聖神文武之光昭屬茲中外臣民之慶幸萬方送喜知咫尺之

龍顏子身抱憂遠瞻依於鳳闕顧臣子有難仰承之

殊遇惟

聖明示不世見之

異恩回思鞠我之勞有懷罔極夙識事君之義莫効微
忠苟溝壑之遂填永佩深仁而入地或蓋帷之未瘞長
賡景福以齊天臣不勝匍匐頂戴之至謹具本遣臣男
國子監生陳謙吉捧赴通政司投進為此奏謝以

聞

遵例自陳疏

康熙二十年十月二十四日經筵日講官起居注翰林院掌院學士兼禮部侍郎臣陳廷敬奏伏見吏部題准康熙十八年京察例應自陳官員丁憂在籍服闋到京即行自陳臣丁母憂今年十月二十一日到京例當備開履歷事蹟仰祈

睿鑒竊臣原籍山西澤州人中順治十五年進士選庶吉士十八年充會試同考試官本年授內祕書院檢討

康熙元年以病請假回籍四年仍補檢討六年考察一等稱職八年陞國子監司業九年陞內祕書院侍讀十年改翰林院侍講本年轉侍讀陞侍講學士十一年纂修

世祖章皇帝實錄告成加一級食俸本年充日講起居注官十二年考察一等稱職本年轉侍讀學士充武會試副主考又充武殿試讀卷官十四年陞詹事府詹事兼翰林院侍讀學士十五年以冊立

東宮奉使祭告北鎮本年陞內閣學士兼禮部侍郎充經筵講官十六年轉翰林院掌院學士兼禮部侍郎教習庶吉士充日講起居注官本年充

太宗文皇帝實錄副總裁官十七年充纂修皇輿表總裁官本年十一月聞母訃回籍守制今服闋到京伏念臣蓬華賤士質鄙學疎叨沐

殊恩累擢近列厠講席深嚴之地玷禁庭侍從之班曲荷知憐初無報稱徒蒙寵渥時切憂兢臣前者邁罹母

喪倉皇去職存問仰煩

天使恩膏頒自尚方洎當請卹更出

特恩憫似髮之微勞命從三錫降如天之異數澤及九
原竊念臣母子之所遭皆自古君臣之希邁蓋恩隆則
責宜重乃材薄而眷有加即縻隕百身莫塞尸榮之咎
而栖遲三載已寬幽黜之期知有未報之

鴻慈永慚高厚良無可覩之後效恐負

聖明伏祈

皇上立賜處分以為不職者戒臣不勝悚息待命之至
歲終講義循例題明疏

康熙二十年十二月十九日經筵日講官起居注翰林
院掌院學士兼禮部侍郎臣陳廷敬題竊惟成湯自警
惟又日以常新大禹克勤必寸陰之是惜蓋君道法天
行之健而聖功懋時敏之修故積日月而歲序以成於
穆不已亦凜就將而德行斯顯悠久無疆欽惟

皇上表正建中經文緯武造四海昇平之治偕二儀覆

載之功屬前者小醜之陸梁屢數載

九重之旰晷邊機旁午未當息馬投戈

文命誕敷不輟窮經論道益勵精遜志固已卓冠百王
故

神略英謀自爾前無千古運天下於掌上信內順而外
威視萬里為目前亶風行而化洽遂成格苗戡黎之績
允惟稽古右文之時既研極夫六藝之精出話經而吐
辭雅亦推行於諸史之實承烈武而顯謨文謂大易載

開物成務之微言而兩漢具鑑古知今之軼事縹緗進
御嘗勤丙夜之觀惟幄敷陳時備宵衣之問臣等玩飛
龍之大義雖願學昭素之對君覩司馬之全書未能如
一柔之竟讀勉尋舊學忽逢歲籥之更新懼負

殊恩每近

天顏之有喜閱流光之易邁知典學之彌殷日居月諸
曾炎燠祁寒之罔間歲聿暮矣猶晦明風雨之其勤伏
值年終謹循舊例應將講義逐一題明易經日講解義

現在校刊按日經鑑講章卷留省覽至於年終彙進前經

睿旨諭停非謂少損夫鉛槧之繁蓋因已置諸几席之上簡編盈溢義蘊弘多伏願體六位以成能象三辰而立極一道德而同風俗弘闡先聖之傳經興禮樂而定章程高掩千秋之遺史將見光天之治再見於中天而震世之功永垂於奕世矣

臣等不任諄切之至

制錢銷毀滋弊疏

康熙二十三年八月十七日經筵講官吏部左侍郎管
右侍郎事仍兼翰林院學士管理京省錢法臣陳廷敬
題竊惟銅鉛之微物製為錢貨之重寶愚民牟利法久
弊滋所貴因時制宜務在便民裕國自古鑄錢時輕時
重治平之世未有數十年而不改易者臣奉

命清理錢法期於國寶流通公私交便以副我

皇上簡任至意前所請核減耗銅節省工料等項業經
奉

旨會議允行臣更有請者今日民間所不便者莫過於
錢價甚貴定制每錢一千直銀一兩今則每銀一兩僅
得錢八九百文其故由於制錢之少夫國家歲歲制錢
宜乎錢日多而賤今乃日少而貴者蓋因姦宄不法毀
錢作銅以牟厚利之所致耳夫銷燬制錢著之律令其
罪至重然而不能禁止者厚利之所在故也今銅價每
觔值銀一錢四五分計銀一兩僅買銅七觔有餘而燬
錢一千得銅八觔十二兩即以今日極貴之錢用銀一

兩換錢八九百文毀之為銅可得七角七八兩尚浮於
買銅之所得何況錢價賤時用銀一兩所換之錢可毀
銅至十餘觔者乎銅價既貴奸人爭毀制錢以為射利
之捷徑鼓鑄之數有限銷毀之途無窮安得不日少而
日貴乎苟不因時變通其弊將無所底止矣若欲除毀
錢之弊求制錢之多莫若鼓鑄稍輕之錢察康熙十九
年錢價甚貴以致民間苦累

皇上特諭令一文重一錢九卿議以為順治錢重一錢

因順治十年舊錢壅滯改鑄新錢重一錢二分五釐十七年因錢價賤又改鑄新錢重一錢四分前有廢輕而改為重者未有舍重而從輕者如錢輕少則有私鑄以此未經施行臣竊思國家之法本以便民苟有利於民即於國無利猶當行之況行之利於國而亦利於民乎夫向之改輕為重為便民也今民既不便矣自應改重為輕今若改鑄重一錢之錢毀錢為銅既無厚利則毀錢之弊將不禁而自絕矣錢不毀而日多則錢價平而

有利於民矣總計寶泉寶源二局每年各關動支稅銀二十五萬三千兩辦解銅三百八十九萬二千三百零七觔十一兩內除耗銅三十五萬三百零七觔十一兩浮銅三百五十四萬二千觔現行例鼓鑄錢四十萬零四千八百串直銀四十萬零四千八百兩今若改重一錢仍每串作銀一兩計每年多鼓鑄錢一十六萬一千九百二十串直銀一十六萬一千九百二十兩臣所謂利於民而亦利於國者也再察前經戶部等衙門議覆

錢法侍郎田六善條奏令天下產銅鉛地方聽民開採
行令直省督撫於產銅鉛處令道官總理府佐官分管
州縣官專責稅其二分分別紀錄加級至今開採寥寥
皆因地方官征收其稅滋為弊端以致徒為收稅之名
而無開採之實此後應一切停罷聽民自便或有開採
則銅日多而錢價亦因可以得平也

勸廉祛弊詳議定制疏

康熙二十四年正月二十四日經筵講官都察院左都

御史管理京省錢法

臣

陳廷敬奏竊惟國家久安長治

之基關於風俗風俗盛衰之故繫乎人心正人心厚風俗之機存乎教化故品節度數必有定制所以辨上下定民志使天下移風易俗回心向道尤教化之急務也
洪惟

皇上堯仁舜哲禹儉湯勤總攬天下之大權先教化而後刑罰謂禮義廉恥國之四維而宏獎官方廉為尤重
臣愚謂貪廉者治理之大關奢儉者貪廉之根柢欲教

以廉當先使儉然而不能遽致者則積習使之然也臣
伏見我

皇上盛德淵純躬先節儉御服無奇麗之觀尚膳鮮兼
珍之味蚤朝晏罷謹小慎微與中外臣民共登淳古之
風一時公卿大夫是則是倣宜蒸蒸有不變之機矣臣

謂風俗未能盡儉者蓋古者衣冠輿馬服飾器用之具
婚喪之禮賤不得踰貴小不得加大今或等威未別因
而奢僭之習未盡化也百金中人之產一裘之費奚啻

百金綺紈之服機絲所織花草蟲魚時新日異舊者猶
新新者已舊貧者循舊而見嗤富者即新而無厭轉相
慕倣積以成風外官之任者或擁僉從數十百人衣輕
策肥車馬聞咽震驚道路泥沙之用不惜貪饕之行易
成由是則富者黷貨無已貧者恥其不如冒利觸禁妄
冀苟免幸不罹於法則以高貲誇耀閭里愚民無知見
其如此游末趨利多離農畝棄其本業賈誼所謂一人
耕之十人聚而食之欲天下無飢不可得也百人織之

不能衣一人欲天下無寒不可得也其始由於不儉其繼至於不廉其卒至於天下飢寒飢寒切於其身姦宄因之而起此所以刑罰未能衰止也然則風俗何以厚之亦曰正人心而已夫好尚嗜慾之中於人心猶水之失隄防也是教化之所宜先務矣伏祈

敕下廷臣博考舊章詳議定制

御賜之衣物許其服用及近御之人照常不議外官員士庶冠服衣裘飾用之制婚喪之禮有宜更定者斟酌

損益務合於中其淺近易行如貂捨剝獮昔有官品之分今則庶人服之矣如緞綢昔有官民之別今則雜然無辨矣並宜釐正使永遠遵行至若外任官與馬僕從不得過侈制度既定罔敢陵越則節儉之風可以漸致工者不必矜能於無用商者不必通貨於難得竒技淫巧棄本趨末之民將轉而緣南畝田疇闢則民無飢寒民無飢寒然後可以興於禮義廉恥而國之四維以張太平無疆之盛治端在於此又豈惟勸廉吏而已臣管

闕蠡測無補高深緣係條奏意須明悉字稍逾格統祈
睿鑒施行

請嚴考試親民之官以收吏治實效疏

康熙二十四年正月二十四日經筵講官都察院左都
御史管理京省錢法臣陳廷敬奏恭惟

皇上宵衣旻食存心於天下加志於萬民洞知閭閻之
疾苦歷觀稼穡之艱難擢用循良振興吏治將使官奉
其職民樂其生永臻太平邳隆之風竊謂與國家共理

此民者外則督撫司道府州縣等官督撫司道彈壓表率府州縣以理民者也而與民最親者無踰於知府知州知縣者矣臣愚謂親民之官其職至重至於文移簿書期會訟獄之事皆身自經理不得假手胥吏使夤緣為奸其事又甚難也自捐納以來有未經考試之人輒授正印親民之官者夫古者以經術為吏治必學古然後可以入官今即不能盡然而亦須略曉文義之人委以民社之寄臣查俊秀一項初捐既是白身有司曾未

一試而吏部輒與選補則其文義通闇何由得知此項人若一槩束之高閣則既已嘗許其得官若盡數錄用則自古未有不曉文義之人可以為民父母者也臣察兵部有考試武職之例凡副將叅將遊擊等官單雙月選補先期考試弓箭不合式者不准選補下月復考必待其合式而後用之武職重之如此何況親民之吏乎臣又察吏部有考試招民知縣之例招民之與捐貲事體相類又不宜彼重而此輕也臣愚謂知府知州知縣

凡俊秀捐納有已經考職後捐納者依例選除有未經考職遂行捐納者於選除之時仍行考試文義略曉者即與錄用否則且令肄業聽其再試凡考試之時若繩以八股經義既非其所素習亦難以猝然而能合無試以時務策一道判一條但須嚴加防察毋得令其代倩傳遞徒應虛名如此則既不絕其功名仕進之路亦使之有鄭重名器之思庶可以責吏治之實效也伏祈

睿鑒勅議施行

午亭文編卷三十

欽定四庫全書

午亭文編卷三十一

大學士陳廷敬撰

奏疏

請嚴督撫之責成疏

康熙二十四年九月初六日經筵講官都察院左都御史管理京省錢法臣陳廷敬奏今天下之事繫於督撫督撫之職在察吏安民若民犯法者多刑辟不止惡在

其能安民也察吏之意欲令民安若民犯法者多刑辟不止惡在其能察吏也臣見直省各督撫所上刑獄章奏繇多夫督撫之職在安民者非謂民既犯法而明於擊斷之為能盡其職也謂民未犯法而嚴禁令謹科條使民遷善遠罪至於刑清政簡之為能盡其職也故督撫之能與不能視其所治之民而已矣民之安與不安視其刑之清與不清政之簡與不簡而已矣直省之刑清而

朝廷之刑清矣直省之政簡而

朝廷之政簡矣政簡刑清王道之大端也或曰民自犯
法耳於督撫何尤焉孔子有言上教之不行罪不在民
也故欲使民不犯法而刑辟哀止莫先於行上之教欲
行上之教繫惟督撫是問督撫曰是將在羣吏夫吏果
廉能毋敢有加派毋敢有火耗毋敢黷貨於詞訟毋敢
朘削夫富民然後一意行上之教而民不罹於刑今吏
或不能誠有罪焉然非盡吏之罪也人苟稍稍知詩書

識道理一行作吏誰忍自棄而今或不能者非盡吏之
欲私肥其家蓋迫於上官耳上官廉則吏自不敢為貪
上官不廉則吏雖欲為廉而不可得吏既不得廉則凡
所為加派火耗黷貨賸削之事日以曲事上官之不暇
而又何有於行上之教使民不罹於刑雖使吏勉強行
之而民習見吏之所為多不法也曰是惡能教我誰其
從之是教之不行刑之不止吏為之也吏之為之者督
撫使之然也方今要務在於督撫得人為督撫者既不

以利欲動其心然後能正身以董吏吏既不復以曲事
上官為心然後能加意於民向之所為加派火耗黷貨
賂削之事舉皆無之夫然後民可徐得其養養立而後
教可行也至於教民之法三代盛矣古今異宜所貴得
其意而神明之而其大要莫重於讀法之令周禮鄉大
夫之職各掌其鄉之政教禁令正月之吉受教法於司
徒退而頒之於其鄉吏使各以教其所治歷代以來有
講讀律令之法皆周禮之遺意為教民之要務也夫欲

教民以道必先信上之令以實致乎民管子曰國之重
器莫重乎令令重則君尊君尊則國安賈山曰臣聞山
東吏布詔令民雖老羸瘡疾扶杖而往聽之思見德化
之成是以人臣敬君之命令尊之如雷霆之不敢侮盖
以人君之所以為國鼓舞羣下者恃其命令而已臣伏
讀

皇上聖諭十六條頒行已久彼時雖一經張挂曉諭而
鄉邨山谷之民至今尚有未知者臣近日惟見山東巡

撫張鵬有

上諭十六則講義及臣鄉山西寧鄉縣知縣龔應霖講約書其實心奉行與否當俟之事久論定之時至於一經曉諭而旋視為具文者比比皆然臣所謂信上之令以實致乎民者責在有司而督撫為要矣臣欲祈

皇上特降嚴綸通飭督撫使賢者知勉而否者知懼洗滌舊染專以潔已教吏吏得一心養民教民為事其督撫保薦府州縣官也須要第一條實填一本官無加派

無火耗無黷貨詞訟無腹削富民十九字第二條實填一本官實心奉行

上諭每月吉聚衆講解鄉邨鄉約講解二十二字如保薦不實者請

勅部將保薦之督撫具揭之司道並所保薦之官嚴議處分定例不得仍用常例處分餘條仍照舊例開具實蹟凡若此者所貴督撫知功令之重在此顧名思義觸目警心以導羣吏也而

皇上之考察督撫則以潔已教吏吏得一心養民教民
為稱職否者罷黜治罪

聖主在上坐照如神自有洞鑒

臣

之愚惟祈

朝廷切責督撫以幾刑清政簡之風故敢獻其鄙言助
成王道之治竊虞辭難達意故字多逾格統冀

鑒宥施行

請議水旱疏

康熙二十四年九月初六日經筵講官都察院左都御

史管理錢法臣陳廷敬奏臣伏惟

皇上盛德湛恩蟠際天壤閔念黎元甚於赤子發倉廩
蠲租賦弛山海之禁謹儲積之防重恤農事勤求民瘼
所以便利安全兆姓之道甚備茲者仰賴

皇上德恩歲穀既登惟一二水災猶厪

睿慮夫水旱凶荒堯湯之世不能盡無惟其備及於豫
而調當其急故民恃以無恐臣於報免災荒敢因

聖意之所垂念者少獻其末議焉臣前見山東巡撫徐

旭齡於康熙二十三年九月題報濟寧海豐霑化水災情形該部題覆行令委官踴勛於十一月該撫題濟寧等三州縣成災分數並應蠲免錢糧冊結該部題覆行令分晰地畝高下於二十四年四月巡撫張鵬題濟寧等三州縣並無捏報被災分數照例請免本年錢糧該部乃覆准蠲免自去年九月至今年四月八閱月矣是此一水災之報也巡撫初題報其形情再題報其分數三題稱無捏報此一水災之免也該部初覆令其委官

蹋勘再覆令其分晰地畝高下及其具題至於三也然後覆免是則自報至免巡撫具題者三戶部具覆者三疊疏奏聞上勞聽覽以故

德音下逮近省已踰半年遠省將不止一載在

皇上恤民之意如彼其勤而在所司出納之際如此其遲廻者非故為是鄭重也所行之例則然耳臣愚謂被災之分數即見地畝高下之間而地畝之高下即宜分晰於分數多寡之內蓋再題而該部可具覆矣不必駁

察至再而具題至三也如此則上宣

聖主勤民之意下慰小民望澤之心中不得使猾吏奸胥緣為弊竇況該部既行令委官踴勘分數於初又行令分晰地畝高下於再其分數高下從來惟以巡撫之具題為據不見有所增損其間則咨行亦是虛文再駁愈覺可已臣請於巡撫具題分數之後既有冊結可據該部即宜具覆豁免更不再駁務取早結為便昔漢武帝使汲黯視河內火還報曰臣過河南貧人傷水旱萬

餘家謹以便宜持節發河南倉粟以賑貧民請歸節伏
矯制之罪武帝賢而釋之夫黯所視者火而所賑者水
旱黯不以非其職自解武帝不以矯制罪黯蓋急民之
急也昔人謂救荒如拯焚溺若稽遲歲月始沛德音

皇上如天怙冒之心必不若此臣之所見實

聖意之所及故敢進其愚說伏祈

睿鑒採擇施行

撫臣虧餉負國據實糾叅疏

康熙二十四年九月初六日經筵講官都察院左都御史管理京省錢法臣陳廷敬奏竊惟雲南捐納事例乃皇上斟酌時宜所以恤民而裕餉顆粒皆係國儲絲毫悉關軍食為撫臣者宜如何撙節清釐以無負封疆之重寄乃臣於雲南巡撫某有異焉臣閱邸抄據該撫某疏稱大兵還京尚餘捐納米五十一萬四千六百餘石草一千一百六十一萬五千餘束彼時即應支放乃留米不發反動支庫銀二萬五六千兩買米一萬石每石

用銀二兩二錢至二兩八錢不等又留草不給動支庫銀四十四萬兩折給草一千七百五萬一千七百六十四束每束用銀三分以現在之米草不以支給大兵而濫用公帑另行採買此何說也及至大兵凱旋始巧行題請將前項所存米草動給官吏等項驛遞馬匹米一石止扣銀一兩二錢草一束止扣銀一分以今扣算之數較前採買之價相去不啻霄壤此又何說也臣意某當大兵還京之日使果有現存米草斷不另買必是

先將報捐之米草多行折銀入已無從支給故為此掩飾一時之計是其侵沒之弊顯然可見者也至於凱旋之後苦於開銷無策乃朦朧請給本省官俸驛遞蓋以大兵之供應甚急而本省之支銷可緩大兵之供應分毫不可假借而本省之支銷任意可以通融也獨不思某當日所收之米草即照採買之價計之米五十一萬四千餘石為銀一百二十九萬兩有餘草一十一萬六千餘萬束為銀三十萬兩有餘而今請扣之銀止共為

七十餘萬兩是一那移之間而某侵沒餉銀已九十餘萬兩矣即使無侵沒入已之弊而身為封疆大吏當軍興之際不思裕國省餉虧損國課幾至百萬之多溺職不忠之罪某雖百喙何以自解乎伏乞

皇上勅部檢察前後報部文冊奏銷價值難逃

睿照迅賜處分庶錢糧不致侵濫而官邪知所儆惕矣
臣職司風紀不避怨嫌謹據實糾叅伏祈

睿鑒施行

俯瀝懇誠祈准回籍以安愚分疏

康熙二十七年五月初二日

經筵講官吏部尚書管理修書總裁事務臣陳廷敬奏
臣薄劣孤生迂拙自守荷蒙

皇上天地養育之恩生成造就寵祿逾涯臣自念無他
材能報塞萬一惟早夜兢兢思自淬厲不徇親黨不阿
友朋上恐負

聖主之殊恩下欲全微臣之小節乃至積有疑讐飛語

中傷如前楚撫一案者汧雖臣戚涇渭自分嫌疑之際
尤臣所慎彼既敗事遂疑及臣積疑成恨語涉連染今
幸我

皇上日月中天無幽不燭既難逃

聖主睿鑒之明復一付盈廷至公之論雖臣之心跡即
此可白而臣之自處須適所宜惟當引退田間永銜
恩於高厚詎可抱咎夙夜猶廁跡於班行即

聖度之寬容曲加憐恤而臣心之跼蹐倍切徬徨且臣

年力早衰兩目昏暗自被誣以來神志摧沮事多健忘
奏對之頃失其常度蒙

皇上不加譴責而臣之心實難自安也若復貪冒榮寵
罔識進退曠官尸位過誤滋多又臣父年八十有一倚
閭懸望昔戴恩而未去今因事以陳情伏乞

聖心憐憫准與回籍則詠歌舜日常沐浴於時休耕鑿
堯天得自安其愚分臣無任感激涕泗戰栗屏營之至

直陳言官建白疏

康熙二十九年四月十一日經筵講官都察院左都御史臣陳廷敬奏臣賦質迂踈謬膺重任茲荷

新命再領臺班冰檠自持涓埃未荅伏念風紀重任臣若不正已率屬益加砥礪則有負

皇上簡畀之意亦非生平惓惓報

主之心視事以來每進臺臣而告誡之退食私居嚴杜請謁凡有建白不許預聞於堂官僚友以滋指使囑托之弊其有陋習未除必仰冀

天語申飭者敬為

皇上陳之臣思科道之設所以廣耳目而申獻納於人
才之邪正吏治之貪廉事關生民利害者必正言無隱
而後克副斯職如中外臣僚果有奸貪不法因革事宜
果有紀綱關係者則當切實指陳否則與其生事以塞
責不若省事而擇言蓋專欲以塞責了事則不免毛舉
細故剔摘成例馴至於刻薄齟齬碎不急之務而無裨於
聖朝寬大經久之規如近日兵部議處武官以疎防為

諱盜草職多員蒙

皇上神明洞照今其改正此類事情部臣何以不言必待言官言之而言官所言者又不能皆如此確當有益之事是以或失於苛細不急之務而徒為此紛擾也臣故曰與其生事以塞責不若省事而擇言也方今

朝廷清明紀綱具在所不能保其必無者猾法不肖之人耳國家耳目之官專因此輩而設若能省事而擇言則必持重而養銳言不輕發發而必當使不肖之徒有

所警戒顧忌而不敢恣意為非此言官之職掌即紀綱之攸存臣所謂省事而擇言非欲其避事以自便伏乞皇上特加申飭嚴禁塞責則庶乎不至以無補之繁言瑣瀆

聖聽也臣又念進言之體貴乎簡明近見條奏一事冗長之詞多論事之言反少我

皇上聖學聖治豐功懿德日盛月新史官書之儒臣紀之而且萬方臣庶共矢謳歌海外風行亦深頌禱顯鑠

一時而垂美億禩者既已至矣亦何待言官於條奏建
白之時綴述數端既不足以揚盛美之萬一而於言事
之體有不當然者况

皇上一日萬幾旰食不遑而章疏拉雜間文冗沓繁蕪
致煩

乙覽兼乖辭尚體要之義諒我

皇上必已厭薄之特

聖度優容不加詰責耳併祈嚴勅科道官不得踵習前

弊多引煩詞如有不遵量加處分庶幾息便辟之風作
謬諤之氣矣

慰問謝恩疏

康熙三十一年八月十六日經筵講官刑部尚書加二
級臣陳廷敬奏為恭謝

天恩事臣以庸愚蒙

聖恩教養三十餘年不次拔擢歷遷要職備極殊榮仰
戴高深莫報萬一臣辜負

聖恩命竒福薄蹇遭父故仰蒙

聖心矜憐遣內閣學士兼禮部侍郎

臣

戴通內閣學士

兼禮部侍郎

臣

王尹方至

臣

私寓恩賜茶酒

臣聞

命自天撫躬無地殊恩異數霑被非常

臣

不勝悲痛不勝感激伏念

臣父昌期蒙

恩累封資政大夫吏部尚書再蒙

恩封光祿大夫刑部尚書生晉崇階歿邀曠典此實古

今來最難得之恩遇允惟

臣

父子不世出之遭逢蓋

君恩莫大乎榮親而臣力長慚於報

主臣今回籍守制自此遠去

闕廷無由瞻望

天顏臣不任銜感涕零之至

諭祭謝恩疏

康熙三十二年二月初二日經筵講官刑部尚書加二級臣陳廷敬奏為恭謝

天恩事臣以父憂蒙

聖心軫念臣銜恩就道感泣抵家父老見臣遠歸間來
慰唁臣荒迷之際但聞皆稱

聖君在上蠲租賜粟吾儕小民得以樂生已又見深山
窮谷感頌

皇仁至於村童野婦無不皆然而自冬以來雨雪頻仍
豐年可卜臣治喪稍暇閉門寂處忽蒙

天恩賜與

諭祭到臣廬次臣謹望

闕謝恩感激悲傷不能自己伏念臣遭憂之日蒙

遣使恩賜茶酒

臣隨具奏恭謝仰荷

聖旨批荅又獲

天寵下頒光生閭里

臣感

恩戴德彌切永兢謹瀝陳微悃恭遣義男陳忠賁奉通

政司封進仰祈

聖鑒臣不任悚惕瞻依之至

午亭文編卷三十一